

պաշտօնը նա պատուով վարեց ամբողջ 25 տարի (1655-1680) :

Յակովբ Զուղայեցին մեր կեանքում կրրկնակի արժէք ունի . նա նշանաւոր է նախ՝ որպէս ամենայն Հայոց կաթողիկոս եւ ապա՝ որպէս քաղաքական գործիչ :

Դաւրիթեցին մեծ գովասանքով է խօսում կաթողիկոս Զուղայեցու մասին, անուանելով նրան «մեծահոգ եւ երկայնամիտ», «խոհական եւ արժանաթառանգ հայրապետ» : Հայոց կաթողիկոսներէ շարքում նրա անունը եւս յիշելով, պատմագիրը ցանկանում է, որ Աստուած նրան «երկար ամօք պահեսցէ յուրախութիւն սրտից մերոց եւ ի փառս անուան իւրոյ» (Գլ. Լա) :

Նոյնպիսի հիացմունք ունի կաթողիկոս Զուղայեցու հանդէպ նաեւ Չամչեանը : «Յամչեանսի եցոյց զինքն — գրում է նա Զուղայեցու մասին — առաքինի եւ զգօնամիտ, լայնախորհուրդ եւ վեհանձն» (Գ. 657) :

Զուղայեցու վայելած այս յարգանքը բըխում էր նախ նրա շինարար գործունէութիւնից : Բազմաթիւ են շինարարական այն գործերը, որոնց կամ անմիջական հեղինակն էր նա, կամ նրանց հովանաւորողը, խրախուսողը : Վանքեր, եկեղեցիներ, դպրոցներ, ջրանցքներ — աստ՝ այն շէնքերը, որոնց մի խոշոր մասի գոյութիւնը մեր երկիրը պարտական է Զուղայեցու շինարար ձեռքին : Եւ այդ շինարարութիւնը մեր աչքում աւելի է արժէքաւորում, երբ ի նկատի ենք առնում, որ այդ վանքերն ու եկեղեցիները, մանաւանդ վանքերը, ո՛չ թէ սովորական կրօնական հաստատութիւններ էին միայն, այլ եւ մի-մի դպրոցներ, բարոյական կեանքի եւ լուսաւորութեան մի-մի օջախներ, որոնք ուսում, լոյս, ազգային ինքնաճանաչութիւն եւ բարոյական կեանքի սկզբունքներ էին ախոռում իրենց շուրջը :

Մենք արդէն տեսանք, որ նա հիմքից նորոգեց Գարաշամբի Ս. Ստեփաննոսի վանքը, այն էլ դժոխային նեղութիւններով — քարը, կիրը, փայտը եւ բոլոր հարկաւոր նիւթերը Արաքսի միւս ափից, հեռաւոր տեղերից գրաստներով բերել տալով : Այնուհետեւ նա շինեց եւ վերջացրեց Էջմիածնի զանգակատունը, որը սկսել էր Փիլիպպոս կաթողիկոսը, բայց կի-

սատ էր մնացել, որովհետեւ Երեւանի Խանը, թշնամի լինելով Փիլիպպոսին, արգելել էր շինութիւնը : Նրա շինարարական մեծ գործերից մէկն էլ այն էր, որ փորել տուեց մի երկար ջրանցք եւ ջուր բերեց Էջմիածին, դրա հետ միասին աւելացնելով նաեւ վանքի եկամուտները :

Կանգ չառնելով մէկ առ մէկ Զուղայեցու բոլոր շինարարական վաստակների վրայ, Դաւրիթեցու մէկ վկայութեամբը փակենք մեր խօսքը . «Կան բազում վանօրայք նորոգեալ եւ բազում եկեղեցիք ի հիմանց նոր շինեալք՝ ի քաղաքն Տփիսիս եւ ի դաւառն Լօռւոյ եւ յաշխարին Արարատու, ի դաւառն Սիսակայ եւ յաշխարհին Ղափանայ, ի քաղաքս Նախջուան եւ ի դիւղօրայս նորա, որպէս չքնաղ եւ մեծաշուք եւ վայելուչ եկեղեցիին Աստապատու եւ քաղաքին Նախջուանու եւ ձահկայ գեղջն եւ Գաղ գեղջ, որք շինեցան յաւուրս տեառն Յակոբ կաթողիկոսի» (Գլ. ԻԶ) :

Զուղայեցու կաթողիկոսութեան միւս գեղեցիկ եւ բնորոշ գիծն էլ այն է, որ նա լինելով ուսումնասէր մի անձնաւորութիւն, նպաստել է հայ տպագրութեան եւ առ հասարակ հայ գրքի ծաղկման :

Ամենից առաջ եւ գլխաւորը՝ Առաքել Դաւրիթեցու պատմութիւնը, որը միակ եւ շատ թանկագին աղբիւրն է ԱՊ-րդ դարի մեր պատմութեան համար, մենք պարտական ենք Յակովբ Զուղայեցուն : Ճիշդ է, թէեւ Դաւրիթեցին իր պատմութիւնը գրել սկսել էր Փիլիպպոս կաթողիկոսի առաջադրութեամբ եւ հարկադրանքով, սակայն նրա մահից յետոյ թողել էր կիսատ եւ տրամադրութիւն չունէր շարունակելու : Պատճառը, որ ինքը արդէն ծերացած լինելով, գործը յիշաւի շատ ծանր էր նրա համար, իր ասածին պէս՝ «կարի բազմախոնջ, յողնաշխատ, բազմաներկ եւ տաժանելի» :

Սակայն 2 տարուայ դադարից յետոյ՝ նա ստիպուած է լինում նորից գրելը ձեռք առնել եւ իր «տաժանելի» գործը շարունակել, որովհետեւ Յակովբ կաթողիկոսը, լաւ ըմբռնելով նրա աշխատութեան արժէքը, համոզում է նրան եւ նորից գործի լծում : «Սրբազան հայրապետն մեր Յակոբ կաթողիկոս — գրում է նա — վերստին յիշումն արար այսմ գործոյ եւ